

«Scriver per betg esser malventiraivel»

■ **L'autur e filosof Iso Camartin ha prelegì sonda passada al «punct dubel» en Chasa Rumantscha e discurrì davart la motivaziun da scriver e davart auturs e dunnas che l'han impressiunà.** Tschertins dals giasts a la prelecziun da sonda passada en la Chasa Rumantscha a Cuir era al cumenzament forsà in zic trumpads. Al «punct dubel», las prelecziuns dublas organisadas da la Chasa Editura Rumantscha e da l'Uniun per la Litteratura Rumantscha, sa preschantan normalmain dus auturs da dus differents idioms. Davant al palc seseva dentant mo in autur. Per motivs da sanadad n'aveva l'autura *Leta Semadeni* betg pudì vegnir a Cuir. Ma *Iso Camartin* aveva purtà cun el in truchet plain texts rumantschs ch'el avess pudì emplenir in'entira notg prelegind e discutond cun *Esther Krättli*.

Gist al cumenzament ha Camartin confessà ch'el haja ina «tolca» en sia carriera dad autur, numnadamain ch'el n'haja scrit nagins cudeschs rumantschs. Persuenter sajan ses cudeschs tudestgs davart la litteratura rumantscha scrits uschè viv, ch'ins na sappia pli tard gnanc pli, sch'il cudesch saja propi rumantsch u tudestg, ha Esther

Krättli manegià sa referind al cudesch «Rätoromanische Gegenwartsliteratur in Graubünden». Il cudesch exaust cuntegna intervistas cun auturs rumantschs ed interpretaziuns da lur ovras. Sco insatg ha Camartin raquintà a moda viva e divertenta, ma er in zic melanconica da ses inscuters, p. ex. cun *Toni Halter* che al aveva instrui da buob co ch'i saja da fimar cigaras. U da sia amicitia cun *Flurin Darms* e da las examinaziuns psicoanaliticas dals texts da Darms, fin che quel haja gi avunda da quellas teorias e «laschè giu las gardinas».

En il discurs ha Camartin tradi sias ideas da scriver in cudesch rumantsch cun texts che furman in viadi tras l'Europa. Sco exempel ha el prelegì il text «Grefla ni grugn?» ch'è situà a Lyon. Da quella idea da viadi derivian ina buna part da ses texts rumantschs. Il scriver sco tal saja ina sort igiena mentala: «Tuts scrivan per betg esser malventiraivels cun sasezs.» Ma per fortuna daventa il scriver mintgatant era public e divertescha, sco p. ex. er en il cas da l'ultim text da quella saira. Quel tracta dunnas sursilvanas che han fascinà Camartin: las uldaunas, in tip da dunnas misteriusas en las ditgas.

Silvana Derungs



L'autur e filosof Iso Camartin ha prelegì sonda passada al «punct dubel» en Chasa Rumantscha.